

SASTANCI PREDSTAVNIKA FEDERALNE UPRAVE ZA GEODETSKE I IMOVINSKO-PRAVNE POSLOVE I ODSJEKA ZA GEODEZIJU GRAĐEVINSKOG FAKULTETA UNIVERZITETA U SARAJEVU

U prostorijama Federalne uprave za geodetske i imovinsko-pravne poslove 09.09.2015. godine održan je sastanak direktora Uprave Željka Obradovića i rukovodioca Odsjeka za geodeziju Građevinskog fakulteta Univerziteta u Sarajevu prof. dr. Admira Mulahusića.



Slika: Sastanak u Federalnoj upravi za geodetske i imovinsko-pravne poslove.

Direktor Obradović upoznao je prof. dr. Mulahusića sa trenutnim aktivnostima Uprave, posebno u vezi sa implementacijom ključnih projekata u sektoru zemljišne administracije u Federaciji BiH, kao i sa budućim planiranim aktivnostima, posebno na zakonodavnom polju. Razgovaralo se i o saradnji Uprave i Odsjeka za geodeziju te je konstatirana dosadašnja nedovoljna saradnja i dogovorene su konkretne aktivnosti u cilju unapređenja saradnje ova dva izuzetno bitna subjekta geodetskog i katastarskog sektora. U tom pravcu dogovorena je posjeta predstavnika Federalne uprave za geodetske i imovinsko-pravne poslove Odsjeku za geodeziju Građevinskog fakulteta.

Prilikom drugog sastanka, održanog u prostorijama Odsjeka za geodeziju Građevinskog fakulteta Univerziteta u Sarajevu 23.11.2015. godine, direktor Obradović upoznat je sa stanjem Odsjeka za geodeziju. Naglašena je izuzetno velika zasluga Građevinskog fakulteta u cjelini, a posebno sadašnjeg dekana prof. dr. Mustafe Hrasnice i ranijih dekana (prof. dr. Husno Hrelje i prof. dr. Muhameda Zlatara), u smislu razvoja Odsjeka za geodeziju u vremenima kada je to bilo najpotrebnije.

Za Federalnu upravu za geodetske i imovinsko-pravne poslove, kao i za geodetsku struku u Bosni i Hercegovini, izuzetno je važna uloga edukacije geodetskih kadrova pri Odsjeku za geodeziju. Istaknuto je da studenti Odsjeka za geodeziju, pored oba entiteta Bosne i

Hercegovine, dolaze i iz Hrvatske, Srbije i sa Kosova. Nekadašnji studenti Odsjeka za geodeziju rade na svim kontinentima, a njihove diplome se priznaju i u smislu nastavka edukacije pri drugim univerzitetima.

Ove godine je upisana i prva generacija studenata doktorskog studija pri Odsjeku za geodeziju, a velika većina nastavnika će biti nastavnici sa Odsjeka za geodeziju.

Predstavnici Federalne uprave za geodetske i imovinsko-pravne poslove i Odsjeka za geodeziju dogovorili su da direktor Uprave u narednom periodu održi predavanje iz oblasti zemljišne administracije za studente završnih godina Odsjeka za geodeziju. Također je dogovorena saradnja u smislu budućih kreiranja planova i programa studija geodeziju i potreba današnjeg tržišta rada. Od uposlenika Odsjeka za geodeziju u narednom periodu se očekuje saradnja sa Upravom u smislu uključivanja u projekte koje realizuje Uprava.



Slika: Detalj sa sastanka održanog pri Odsjeku za geodeziju Građevinskog fakulteta Univerziteta u Sarajevu.

Ovom prilikom se, u ime Uredništva Geodetskog glasnika, zahvaljujemo direktoru Federalne uprave za geodetske i imovinsko-pravne poslove na sufinansiranju ovog broja Geodetskog glasnika.

*Nedim Tuno
Jusuf Topoljak*